



擲頭三尺有攝影機

古早人定定講：「擲頭三尺有神明。」意思就是人咧做，天咧看，好心好行有福報，做惡做毒罪難逃。無疑悟人口爆炸，管區又闊天闊地闊，天界的神明無才調，世間的警察嘛贊袂牢。小賊偷、大賊拈濟甲親像狗蟻，奸巧、騷鑽的工夫袂輸烏鼠佮蛇蜃。眾神準講有千里眼、順風耳，跔踏風火輪，身坐舡斗雲(kun-táu-hûn)，嘛是逐甲喘怦怦，仙氣變厭氣(iàn-khi)。

「天眼」無效，只好拜請「電眼」出招。十冬前阮祖厝的 phòng-phù 仔險仔予人劫去，路尾掠著的賊仔脯毋願煞，三不五時走轉來吵亂。有時表現體育專長——擲糞埽，有時展現語言天份——罵垃圾話，面皮厚厚毋驚見笑！派出所的警員吩咐阮家已收集證據，毋才攝影機佮錄音線就按呢鬥落去。兩萬箍無白開，誠實翕著影，錄著聲，攏總移送予檢察官，舞甲虛 leh-leh，真無簡單才共「魔神仔」送走。

我市內的樓仔厝嘛順繼鬥一組，因為不時有愛狗人士狗仔团牽咧溜溜行，「黃金」、「白銀」四界掖。影片會講話，彼狗仔歡喜到地，尻川出力大範瞪屎，狗主人的眼神滿滿攏是關懷，畫面一清二楚，死諍相嚷無彩工，僥倖失德的人袂輸豬八戒照鏡，隨个仔隨个雞喙變鴨喙。

閣有一擺，兩隻臭 konn-konn 的運動鞋園踎門喙口咧吹風，無跔煞會半暝烏白走，天光無看見影！土想是某乜人棺棺去，貓仔姊、狗仔兄拍算無這款的本等。頂真的鏡頭目睷擘金金，「怪跔」猛掠的手路全部翕現現。竊盜是公訴罪，粗飽的免錢飯攢便便，聽候伊去食迴海。

有時陣我神經線絞無夠絀(ân)，出門袂記得繼手鎖門，轉來到厝當然煩惱甲毋知人，一位一位趕緊七搜八揣，雖然蝨母都無看見半隻，心肝內總是膽膽驚驚。這馬有監視影像出手鬥相共，六十四倍速放落去，「無頭神」攪著大水柴，三兩下手隨得著解救！

求神託佛袂赴市，擲頭三尺愛有攝影機。這個保全勢顧厝，毋驚風吹、雨沃佮日曝，規年迴天綿綿精精袂摸飛，時時刻刻替咱解決麻煩，守護主人家的平安，現代的門神就是伊！

作者：黃文達

☆詞彙學習☆

【無疑悟】bô-gî-gōo：不料、想不到。

【贊袂牢】tsàn-bê-tiâu：支撐不住、承受不了。

【大賊拈】tuā-tshat-kóo：盜賊、賊黨的頭目。

【喘怦怦】tshuán-phīnn-phēnn：氣喘吁吁。

【phòng-phù 仔】phòng-phù-á：幫浦、抽水機。

【死諍】sí-tsinn：狡辯、強辯。

【雞喙變鴨喙】ke-tshui piàn ah-tshui：本來尖嘴利舌，但因犯錯被發現，而啞口無言。

【土想】thóo-siunn：不需細想即可知道。

【食迴海】tsiah-thàng-hái：吃到撐。

【無頭神】bô-thâu-sîn：健忘、沒記性。

【綿綿精精】mî-mî-tsinn-tsinn：非常認真。

【摸飛】moo-hui：偷懶，不做正事偷溜去做別的事。

《臺灣閩南語常用詞辭典》<http://twblg.dict.edu.tw>